

Ce bon vieillard fraîchement baptisé, à la nouvelle qu'il eut de cette esmeute, se mit à chanter incontinent à la façon des captifs qui sont destinez pour les flammes, accourut vers la Chappelle où estoit le plus fort de la sedition, disant pour le fuyet de sa chançon, L'iray aujourd'huy dans le Ciel, ie mourray en la compagnie de mes freres, Iesus aura pitié de moy.

En effet, il estoit proche de sa mort, [99] mais non pas d'une mort si violente. Il tombe apres cela malade, & aussi-tost enuoye querir le Pere, le prie de le disposer à mourir en bon Chrestien, disant qu'il ne craignoit que le peché, ou que venant à perdre le iugement, sa femme & tous ses parens infideles, n'eussent recours pour sa fanté au diable & aux superstitions du païs. Il les appella tous, les exhorta à embrasser la foy, & leur témoigna qu'il renonçoit à toutes les choses deffenduës aux Chrestiens, qu'il desiroit estre enterré en terre Sainte, qu'il mourroit volontiers, & dans vne ferme esperance d'estre à iamais bien-heureux dans le Ciel: qu'ils redoutassent le feu d'Enfer; qu'il ne desiroit plus qu'on luy parlât d'aucune chose de ce monde, qu'il ne vouloit songer qu'à Dieu. Et en effet, il ne rendit plus du depuis aucune responce à sa femme & à ses enfans, à plusieurs questions qu'ils luy firent; son cœur demeurant tout entier pour les choses du Ciel, & sa langue luy estant fidele en ce point, iusqu'au dernier soupir, qu'il rendit apres ces paroles, qui estoient celles de son cœur, [100] Iesus ayez pitié de moy.

Vn peu auant que de mourir le Pere estant seul prez de luy, ce bon Chrestien luy demanda qui estoit vn ieune homme d'une rare beauté, qui se tenoit à son